

浚儀王應麟伯厚甫

地理

三禮義宗引禹受地記王逸注離騷引禹大傳豈卽太史公所謂禹本紀者歟

鹽鐵論大夫曰鄒子推終始之運謂中國天下八十分之一名赤縣神州而分爲九州絕陵陸不通乃爲一州有大瀛海圍其外所謂八極而天下際焉故秦欲達九州方瀛海朝萬國文學曰鄒衍怪說熒惑諸侯秦欲達瀛海而失其州縣愚謂秦皇窮兵胡粵流毒天下鄒衍迂誕之說實啓之異端之

害如此

管子曰齊之水道躁而復故其民貪麤而好勇楚之水淖弱而清故其民輕果而賊越之水濁重而洎故其民愚疾而垢秦之水泔最而稽淤滯而雜故其民貪戾罔而好事晉之水枯旱而運淤滯而雜故其民諂諛而蓀詐巧佞而好利燕之水萃下而弱沉滯而雜故其民愚戇而好貞輕疾而易死宋之水輕勁而清故其民間易而好正是以聖人之化世也其解在水故水一則人心正水清則民心易此卽漢志所謂繫水土之風氣也杜牧亦云山東之地程其水土與河南等常重十三故其人沈

驚多材力重言可謂平也

太史公班孟堅謂禹醜二渠以引其河一貝正一漑

川李垂導河書曰東爲漑川者乃今泉源赤河北

出貝正者乃今王莽故瀆而漢塞宜房所行二渠

蓋獨漑川其一則漢決之起觀城入蒲臺所謂武

河者也晁補之河議曰二渠於禹貢無見

若據按寬州之漑卽

禹所二渠之一渠

禹時河入海蓋在碣石地理志碣石在北

平驪城縣西南計勃海北距碣石五百餘里而河

入勃海蓋漢元光三年河徙東郡所更注也而言

禹時河入勃海何哉

若據按齊都賦海旁出爲勃不獨今天津衛之海名勃碣石之海亦名勃卽曰抑別

有蓋乎余曰莫妙于太史公天官書中國山川東北流其維首在龍蜀尾沒于勃碣班固增其文曰尾沒于勃海碣石益明顯矣

蔡氏禹貢傳曰鳥鼠地志在隴西郡首陽縣西南今渭州渭源縣西也此以唐之州縣言若本朝輿地當云今熙州渭源堡又曰朱圉地志在水西郡冀縣南今秦州大潭縣也按九域志建隆三年秦州置大潭縣熙寧七年以大潭隸岷州今爲西和州當云今西和州大潭縣朱文公詩傳曰秦德公徙雍今京兆府興平縣按輿地廣記鳳翔府天興縣故雍縣秦德公所都也興平乃章邯爲雍王所都之廢止也當云雍今鳳翔府天興縣

呂氏春秋禹南至九陽之山羽人裸民之處不歿之鄉此屈子遠遊所謂仍羽人於丹丘兮畱不歿之

舊鄉朝濯髮於湯谷兮夕晡余身兮九陽

朱文公謂漢之尋陽縣在江北今之江州非古九江地其說明矣然漢柴桑縣屬豫章郡而莽以豫章郡爲九江柴桑縣爲九江亭則九江之名其誤久矣以九江爲洞庭本於水經而胡晁曾氏因之

國語注姑蔑今太湖當作大末甬句東今句章東海口外洲當作淡口蓋傳寫之誤

唐盧潘引地理志浙江出縣縣南率山東入海今漢

志云蠻夷中

戰國策田單爲棧道木閣迎齊王與后於城陽山中

非但蜀有棧閣也

若據按淮南本經訓延樓棧道卽宮室亦有之

楚北有甘魚之口鮑氏注疑爲濟陰高魚非也左氏

昭十三年傳次于魚陂注云竟陵縣城西北有甘魚陂

大事記解題沈黎郡汶山郡地理志不載按輿地廣記漢武帝置郡旣而罷之愚按黃霸傳入穀沈黎郡後漢荊都夷傳武帝所開以爲荊都縣元鼎六年以爲沈黎郡至天漢四年并蜀爲西部置兩都尉一居旄牛主徼外夷一居青衣主漢人并驍夷傳武帝所開元鼎六年以爲汶山郡至地節三年省并蜀郡爲北部都尉靈帝時復分蜀郡北部爲

汶山郡

宣帝紀地節三年十一月省汶山郡并蜀

荀卿爲蘭陵令縣在漢屬東海郡今沂州承縣誠齋

延陵懷古有蘭陵令一章蓋誤以南蘭陵爲楚之

蘭陵也古靈

若璩按古靈陳襄號

詩亦誤

若璩按魏地形志蘭陵郡蘭陵縣有荀卿冢與史記卒因葬蘭

陵合

文中子父曰銅川府君

降爲銅川令

阮氏注上黨有銅鞮縣

龔氏注隋初置銅川縣今忻州秀容是愚考隋地

理志定襄

若璩按當作樓煩始統秀容

郡秀容縣開皇初置新興郡

銅川縣十八年置忻州龔氏注是也

若璩按龔氏名鼎臣明道間人

中說同州府君龔氏本作司州注云宋武置司州於

虎牢西魏始改華州爲同

子夏居西河在汾州文中子之教興於河汾

若璩按宋史地理志

汾州治西河縣卽今更名汾陽縣非古子夏設教地也詳見余博湖掌錄

漢地理志言風俗多取太史公貨殖傳然太史公語尤奇峻可以參觀

地理志禹貢桐柏大復山在平氏東南淮水所出東

南至淮陵

若璩按陵似當作浦

入海禹貢集解云淮陵晉猶存

不知何代廢省今其地當在楚州界愚攷宋州郡

志淮陵郡本淮陵縣

漢屬臨淮後漢屬下邳晉永寧元年爲淮陵國

輿地廣記泗

州招信縣本淮陵縣漢屬臨淮郡宋曰睢陵置濟

陰郡今按漢晉有淮陵睢陵二縣宋濟陰郡有睢

陵縣而淮陵郡無淮陵縣蓋宋之睢陵卽漢之淮

陵也

廣記漢睢陵城在淮陽軍下卽縣

寰宇記古淮陵城在招信縣西

北二十五里然則禹貢解以淮陵在楚州非也

志謂齊俗彌侈織作冰紈綺繡純麗之物號爲冠帶
衣履天下臨淄有服官說苑墨子曰錦繡絺紵亂
君之所造其本皆興於齊景公喜奢而忘儉幸有
晏子以儉鑄之然猶幾不能勝齊俗之侈蓋自景
公始

琅邪郡靈門縣壺山浯水所出音吾元次山名浯溪亦

有所本非自造此字也

溝洫志史起引漳水溉鄴出呂氏春秋先識覽以賢

令爲聖令烏鹵爲斥鹵

若據按河渠書以引漳水溉鄴爲西門
豹余謂西門豹當魏文侯時史起當襄

王時皆爲鄴令皆鑿十二渠利民故左思魏都
賦西門溉其前史起灌其後括地志亦云爾

史記貨殖傳南陽西通武關鄖關正義云地理志宛

西通武關而無鄖關鄖當爲洵洵水上有關在金
州洵陽縣愚按漢志漢中郡長利縣有鄖關長利
今商州上津縣武關在商洛縣正義失之

古公事獯鬻而商不與晉拜戎不暇而周不知封建
之效也唐以幽鎮扞契丹及幽鎮亡而契丹之患
始熾方鎮之效也郡縣削弱則夷狄之禍烈矣

九域志滄州有漢武臺唐太宗紀正觀十九年伐高
麗班師次漢武臺刻石紀功臺餘基三成燕齊之
士爲漢武求仙之處

李太白蜀道難云蠶叢及魚鳧開國何茫然爾來四
萬八千歲不與秦塞通人煙其說本揚雄蜀記愚

謂岷嶓載于禹貢庸蜀八于牧誓非至秦始皇通也
水經引天下之水百三十七江河在焉酈氏注引枝
流一千二百五十二通典謂晉郭璞注三卷後魏
酈道元注四十卷皆不詳撰者名氏不知何代之
書云濟水過壽張則前漢壽良縣光武更名又東
北過臨濟則狄縣安帝更名荷水過湖陸則湖陵
縣章帝更名汾水過永安則彘縣順帝更名故知
順帝以後纂序也愚按經云武侯壘又云魏興安
陽縣注謂諸葛武侯所居魏分漢中立魏興郡若璩按王
禕水經序於立魏興郡下有又云江水東逕永安宮南則昭烈託孤於武
侯之地也又其言北縣名多曹氏時置南縣名多孫氏時置是又若三國
以後人所爲也一段似王氏原文爲
今刊本鈔本所遺殊可惜特補於此

又云改信都從長樂則晉

太康五年也然則非後漢人所撰隋志云郭璞注而不著撰人舊唐志云郭璞撰愚謂所載及魏晉疑出於璞也新唐志始以爲桑欽而又云一作郭璞撰蓋疑之也經云河水又北薄骨律鎮城注云赫連果城也乃後魏所置其酈氏附益歟按前漢儒林傳古文尚書塗惲授河南桑欽君長晁氏讀書志謂欽成帝時人意者欽爲此書而後人附益如山海經禹益所記有長沙零陵桂陽諸暨之名本草神農所述有豫章朱崖趙國常山奉高真定臨淄馮翊之稱爾雅作於周公而云張仲孝友蒼頡篇造於李斯而云漢兼天下皆非本文顏之推

嘗論之矣通典又謂景純注解疎畧多迂怪今郭

注不傳

若璩按漢地理志班固自注引桑欽言者七是欽通地理學有撰著後人以水經歸之與至作郭璞撰可一言以折曰璞注

山海經引水經者八此豈經出璞手哉

三輔黃圖所載靈金內府及天祿閣青藜杖皆王嘉

拾遺記譎誕之說程泰之謂黃圖蓋唐人增續成

之

水經注引黃圖今本所無若璩按王氏弟應鳳字仲儀有訂正三輔黃圖

殷芸小說云諸葛武侯躬耕於南陽南陽是襄陽墟

名非南陽郡也

若璩按南陽爲墟名出異苑註杜者不甚遵之

素問云天不足西北左寒而右涼地不滿東南右熱

而左溫

漢袁良碑云帝御九龍殿引對飲宴集古錄跋謂九

龍殿名惟見於此愚按張平子東京賦曰九龍之內寔曰嘉德注九龍本周時殿名門上有三銅柱柱有三龍相糾繞故曰九龍嘉德殿在九龍門內非但見於此碑也

武后在洛陽不歸長安此通鑑所載也張柬之等舉兵至后所寢長生殿又遷后於上陽宮皆在洛陽程泰之雍錄乃謂長安宮殿誤矣

馮衍賦云臯陶釣於雷澤兮賴虞舜而後親未詳所出水經注引墨子曰舜漁濩澤今墨子尚賢篇曰舜漁雷澤堯得之服澤之陽服字疑卽濩字

漢王嘉傳爲南陵丞顏注南陵縣名屬宣城按漢無

宣城郡南陵縣

宣城縣屬丹陽郡

南陵屬京兆文帝七年置

顏注不攷地理志何邪

禹貢冀州治梁及岐先儒皆以爲雍州之山晁氏謂

冀州之呂梁狐岐山也蔡氏集傳從之

朱文公曰梁山證據不甚明白

若據按朱子不甚分明之言最精

賈誼書曰所謂建武關函谷臨晉關者大抵爲備山東諸侯也武關在商州商洛以限南諸侯函谷在陝州靈寶以限北諸侯臨晉在同州朝邑以限東諸侯

鮑明遠登大雷岸與妹書云棧石星飯結荷水宿旅客貧辛波路壯闊其詞奇麗超絕翰墨畦逕可以

諷誦明遠妹令暉有文才能詩見鍾嶸詩品大雷
在舒州望江縣水經注所謂大雷口也晉有大雷
戍陳置大雷郡庾亮報溫嶠書無過雷池一步

積雨爲池

謂之雷池東入于江爲大雷口元和郡縣志云

余仕于吳郡

右據按仕吳郡乃淳祐登第初著監平江百萬東倉也

嘗見長洲宰其圃

扁曰茂苑蓋取諸吳都賦余曰長洲非此地也問

其故余曰吳王濞都廣陵漢郡國志廣陵郡東陽

縣有長洲澤吳王濞太倉在此東陽今盱眙縣故

校乘說吳王云長洲之苑服虔以爲吳苑韋昭以

爲長洲在吳東蓋謂廣陵之吳也曰它有所据乎

曰隋虞綽撰長洲玉鏡蓋煬帝在江都

按時贈諸葛類

所作也長洲之名縣始於唐武后時在長洲縣西南

七十里未足據也當從郡國志若據按萬歲通天元年析吳縣置長洲蓋取越絕書走犬長洲以名亦非無其地

殺胡林在藥城縣

唐屬趙州後屬真定府紀異錄云林內射殺狐因以名之續通典云唐天后時龔突厥羣胡死於此

故以名之

隋牛弘封奇章公僧孺其後也奇章巴州之縣梁普通六年置取縣東八里奇章山爲名隋唐志通典九域志輿地廣記皆云其章誤也續通典作奇章諸子

漢志曾子十八篇今世所傳視漢亡八篇矣十篇見於大戴禮景迂云世知讀曾子者殆未見其人也朱文公云所記雖或甚疎亦必切於日用躬行之